

# Lèt-la Pòl Ékwi

## Bay Sé Jan Légliz

# Filipay-la

Filipay sété on vil ki an péyi Masédonnya ki té anba kondwit Ronm. Paditan Pòl té asou dézyenm voyaj li pou pwéché Bon Nouvèl-la konsèné Jézi Kwi, i té wè an vizyon koté an nonm Masédonnya ka di'y, "Vini édé nou" (Twavay 16:9-40). Kon sa i té alé èk i établi an légliz an vil Filipay. Pòl té ni twa nonm ki té édé'y établi légliz sala, sété Saylas, Timòfi èk Louk.

Déotwa lanné apwé sa, paditan Pòl té an pwizon an vil Ronm, i ékwi an lèt bay sé jan légliz Filipay-la. Lè i ékwi lèt sala, i té twakasé an chay paski an chay lòt moun ki té kwè an Jézi té kont li, épi i té distwé lè i tann la ni fo titja anpami sé jan légliz Filipay-la. Mé an lèt sala, Pòl ka moutwé ki otan kontantman i ni an tjè'y épi lafwa i ni an Bondyé.

Pòl ékwi lèt sala pou'y té wimèsyé sé jan légliz Filipay-la pou kado-a yo té bay Ipfrodaitòs mennen ba li lè i té byen bizwen'y-lan. Magwé tout twaka-a sé jan Filipay-la té ka jwenn-an, èk twaka i menm té jwenn, Pòl pwan tan sala pou ankouwajé yo pou yo té sa ni kouway épi lafwa an Jézi Kwi. I plédé épi yo pou yo té sa ni kawaktè Jézi Kwi épi pou yo pa vlé tout bagay pou kò yo yonn. Pòl fè yo chonjé lavi nèf-la yo ni-an sé an kado Bondyé té ba yo, épi yo pa ni pou obéyi pyès lwa sé Jwif-la pou vini dwèt douvan Bondyé. An lèt sala i pézé fò asou kontantman-an èk lafwa-a yo kay ni lè yo ka kontiné viv lavi yo kon yonn èk Jézi Kwi. An lèt sala Pòl ka moutwé kalité lanmityé-a i ni pou légliz Filipay-la.

---

**1** <sup>1</sup>Sa sé mwen Pòl, ansanm èvèk Timòfi, dé sèvant Jézi Kwi ki ka ékwi lèt sala bay tout sé moun-an ki an Jézi Kwi-a an vil Filipay. Mwen ka ékwi èspwèsman pou sé moun-an ki ka kondwi-a èk sé moun-an ki ka édé an légliz Bondyé-a.

<sup>2</sup>Mwen ka pwédyé pou Bondyé Papa nou èvèk Senyè Jézi Kwi ba'w lagwas li èk lapé'y an tjè'w.

### **Pòl Pwédyé Bay Sé Jan Filipay-la**

<sup>3</sup>Mwen ka wimèsyè Bondyé tout lè mwen katjilé asou'w, <sup>4</sup>épi tout lè mwen ka pwédyé ba'w mwen ka pwédyé èvèk tjè kontan <sup>5</sup>pou mannyè ou édé mwen simen Bon Nouvèl-la konsèné Jézi Kwi dépi pwèmyé jou-a ou té tann li-an pou jis apwézan. <sup>6</sup>Sé pou sa mwen asiwé Bondyé ki koumansé bon twavay sala an ou kay kontiné'y jis jou-a lè Senyè Jézi Kwi kay witounen lè twavay sala kay fini.

<sup>7</sup>Sé pou'w toujou èspéyé mwen kay santi kalité mannyè sala pou'w paski ou toujou asou tjè mwen. Zòt tout ja édé mwen an twavay sala Bondyé té tèlman bon pou ban mwen-an, ni kon mwen la an pwizon-an ni lè mwen té lib pou mwen té sa wéponn sé moun-an ki ka palé kont Bon Nouvèl-la konsèné Jézi Kwi, pou té moutwé sé lavéwité i yé. <sup>8</sup>Sé Bondyé yonn ki konnèt ki otan enmen mwen enmen'w, épi lanmityé sala ka sòti an tjè Jézi Kwi menm.

<sup>9</sup>Mi sa mwen ka mandé Bondyé ba'w: Mwen ka pwédyé pou lanmityé-a ou ni pou yonn a lèt-la pwofité plis an plis, èk menm lè-a pou'w sa konnèt sa ki lavéwité èk pou'w sa ni bon jijman an tout bagay <sup>10</sup>pou'w sa toujou chwazi sa ki pli bon. Lè sala ou kay viv on lavi ki nèt épi san fòt douvan Bondyé lè Senyè Jézi Kwi kay witounen. <sup>11</sup>Kon sa Jézi Kwi kay fè zòt fè bon bagay ki dwèt an zyé Bondyé, èk sa kay fè moun onnowé Bondyé èk yo kay lévé non'y.

### **Sé Jézi Ki Tout Lavi Mwen**

<sup>12</sup>Mwen vlé'w sav, fwè èk sè, sé bagay-la ki ja wivé mwen-an ja édé mwen simen Bon Nouvèl-la konsèné Jézi Kwi plis toujou. <sup>13</sup>Sé pou wézon sala tout sé gad-la ki an kay gwan wa Ronm-lan èk tout sé lézòt moun-an ki isi-a sav yo mété mwen an pwizon paski mwen sé sèvant Jézi Kwi. <sup>14</sup>Épi kon mwen an pwizon la-a, sa ka bay pwèskè tout sé fwè-a pli konfyans an Senyè-a épi apwézan yo ka vini pli bwav pou di moun konmisyon-an konsèné Jézi Kwi san lapè.

<sup>15</sup>Mwen asiwé an chay adan yo ka pwéché Bon Nouvèl-la konsèné Jézi Kwi paski yo jalou épi yo enmen ban mwen twaka, mé lézòt ka fè'y paski yo ni bon tjè. <sup>16</sup>Yo ka fè sa paski yo enmen mwen épi yo sav Bondyé ja ban mwen twavay-la pou moutwé ki Bon Nouvèl-la konsèné Jézi Kwi sé lavéwité. <sup>17</sup>Sé lézòt-la ka pwéché Bon Nouvèl-la konsèné Jézi Kwi paski yo ni vyé lidé an tèt yo. Yo la pou kò yo yonn. Yo vlé fè mwen soufè pli kon mwen an pwizon-an.

<sup>18</sup>Mé sa pa vlé di anyen. Menm si yo ni bon lidé ében menm si yo ka pwéché pou mété mwen an plis twaka, dépi sé konsèné Jézi Kwi yo ka

pwéché, an népòt mannyè yo fè'y sa ka fè tje mwen kontan. Mwen kay kontan plis toujou <sup>19</sup>paski mwen sav an jou mwen kay vini lib paski ou ka pwédyé ban mwen, épi Lèspwi Jézi Kwi ka édé mwen. <sup>20</sup>Mwen pa té kay avoudwé sòti hont adan anyen. Épi dézi tje mwen sé pou mwen sa palé èk kouway, apwézan menm kon avan, pou mwen sa onnowé Jézi Kwi an lavi mwen, ki mwen ka viv ében ki mwen mò. <sup>21</sup>Ki bon wézon mwen ni pou ka viv? Pou mwen, wézon-an mwen ka viv-la sé pou sèvi Jézi Kwi. Si mwen mò, i an pwofi mwen. <sup>22</sup>Mé si lè mwen kontiné ka viv asou latè-a mwen sa fè pli enpòtan twavay bay Jézi Kwi, mwen pa sav kilès pou mwen chwazi. <sup>23</sup>La ni dé bagay ka hédi mwen. Yo chak ka hédi mwen an diféwan diwèksyon. Mwen té kay simyé mò èk ay jwenn Jézi paski sa té kay ki pli bon pou mwen. <sup>24</sup>Mé pou lapéti'w i pli enpòtan pou mwen sa wèsté vivan. <sup>25</sup>Mwen sav ou bizwen mwen èk mwen asiwé mwen kay wèsté épi'w. Mwen kay wèsté épi zòt tout pou mwen sa édé'w pou'w sa fè pwogwé an lavi-a ou ka viv an Jézi Kwi-a, èk pou'w sa ni kontantman an lafwa-a ou ni an Jézi Kwi-a. <sup>26</sup>Kon sa lè mwen jwenn épi'w ankò, ou kay ni pli wézon pou'w sa ni tje kontan an Jézi Kwi lè ou wè sa i ja fè ban mwen.

<sup>27</sup>Bon, bagay-la ki enpòtan-an sé ou sipozé viv lavi'w mannyè Bon Nouvèl-la konsèné Jézi Kwi-a di ou ni pou viv. Kon sa menm si mwen vini wè zòt ében menm si mwen pa sa vini, mwen kay tann mannyè zòt ka doubout fò èk yonn a lòt. Mwen vlé tann mannyè zòt ka fè fòs kò zòt ansanm épi on sèl dézi pou moutwé kalité lafwa-a ou ka ni lè ou kwè an Bon Nouvèl-la. <sup>28</sup>Pa pè sé lèlmi'w-lan. Doubout fò, épi sa kay moutwé yo sé yo ki kay pèd batay-la épi ou kay genyen, paski sé Bondyé ki ka fè'w genyen. <sup>29</sup>Bondyé ja ba'w pwivilaj-la pou'w té vini sèvant Jézi Kwi, sé pa pou'w kwè an li tousèl, mé pou'w soufè pou lapéti'y tou. <sup>30</sup>Nou an batay sala ansanm. Ou ja wè mannyè mwen té ka soufè pou lapéti'y an tan ki pasé, épi kon ou ka tann atjwèlman, mwen ka soufè jis toujou.

### Pwan Ègzanp Asou Jézi Kwi

**2** <sup>1</sup>Si lavi-a ou ka viv kon yonn èk Jézi Kwi-a ka fè'w fò épi si lanmityé'y ka konfòté'w, épi si Lèspwi Bondyé ka viv an tje'w vwé, épi si ou ni tje sansib èk ou ni konpasyon pou yonn a lòt vwé, <sup>2</sup>ében mi sa mwen ka mandé'w: Sé pou'w ni menm lidé. Sé pou'w ni menm lanmityé pou yonn a lòt. Sé pou'w viv byen èk ni menm katjil èk yonn a lòt. Si ou fè tout sé bagay sala, ou kay fè tje mwen kontan nèt. <sup>3</sup>Pa mété an lidé'w ki ou pli bon pasé lézòt ében pou'w vlé tout bagay pou kò'w yonn. Mé toujou abésé kò'w bay yonn a lòt épi toujou konsidiwé lòt moun-an pli bon pasé'w. <sup>4</sup>Pa gadé pou kò'w tousèl, mé toujou gadé pou lòt moun-an tou.

<sup>5</sup>Sé pou'w ni menm mannyè-a ki té an Jézi Kwi-a:

- <sup>6</sup> Sa Bondyé yé-a sé sa Jézi menm té toujou yé,  
mé i pa konsidiwé pozisyon'y kon Bondyé sété on bagay pou'y té  
tjenbé èk tout kouway li.
- <sup>7</sup> Pito i té fè sa, i menm mété tout sa i té ni asou koté  
épi i vini an sèvant.  
I fèt menm kon on nonm.
- <sup>8</sup> I viv kon an moun  
èk i abésé kò'y  
épi i obéyi Bondyé jis pou mò,  
jis pou mò asou kwa-a.
- <sup>9</sup> Kon sa Bondyé lévé'y  
épi i ba li on pozisyon ki pli ho pasé tout lòt pozisyon an syèl,  
épi an non ki pli ho pasé tout lòt non.
- <sup>10</sup> Kon sa tout sa ki an syèl-la,  
tout sa ki an latè-a, épi tout sa ki an plas-la koté sé mò-a yé-a  
kay tonbé asou jounou yo pou yo onnowé non Jézi,
- <sup>11</sup> épi yo kay di douvan tout moun, "Sé Jézi Kwi ki Senyè-a,"  
èk an mannyè sala yo kay lévé non Bondyé, Papa-a.

### Sé Pou Nou Viv Mannyè Bondyé Vlé

<sup>12</sup> Jan mwen, menm kon zòt té toujou ka obéyi mwen lè mwen té épi  
zòt, i pli enpòtan toujou pou zòt sa obéyi mwen atjwèlman kon mwen pa  
la épi zòt-la. Kontiné fè bon paski Jézi ja chapé'w anba péché. Fè sa épi  
lapè èk wèspé pou Bondyé. <sup>13</sup> Bondyé toujou ka twavay an tjè'w pou'y sa  
ba'w dézi-a pou fè bagay ki ka plè'y épi pou'y sa ba'w kouway-la pou'w sa  
fè sé bagay sala.

<sup>14</sup> Sé pou'w fè tout bagay san ou bougonnen épi san ou chikannen,  
<sup>15</sup> pou'w sa inosan èk san fòt, pou'w sa viv kon ich Bondyé èk tjè nèt  
anpami sé mové moun latè-a ki ni an pil péché-a. Ou ni pou kléwé  
anpami yo menm kon sé étwal-la ka kléwé an syèl-la <sup>16</sup> lè ou ka ba yo  
konmisyon-an ki kay ba yo lavi étonnèl-la. Si ou fè sa, mwen kay ni  
wézon pou mwen sa lévé tèt mwen ho lè Jézi kay witounen, paski sa kay  
moutwé tout twavay-la mwen té fè anpami'w-lan pa té fèt pou anyen.

<sup>17</sup> Lafwa-a ou ni an Bondyé-a ka fè'w viv lavi'w kon on sakwifis pou  
Bondyé. Menm si san mwen koulé pou wouzé sakwifis-la ou ofè bay  
Bondyé-a, mwen kontan an chay épi mwen ka fè tjè zòt tout kontan  
ansanm èk mwen. <sup>18</sup> An menm mannyè-a, sé pou zòt menm kontan tou èk  
sé pou zòt fè tjè mwen kontan ansanm èk zòt.

### Timòfi Èk Ipafrodaytòs

<sup>19</sup> Si Senyè-a vlé, mwen kay voyé Timòfi koté zòt touswit pou'y sa  
voyé nouvèl zòt ban mwen pou mwen sa jwenn ankouwajman. <sup>20</sup> I sé sèl

moun ki ni menm lidé épi mwen épi ki vlé édé'w pou vwé. <sup>21</sup>Tout lézòt dèyè zafè yo yonn épi yo pa mélé èk sa ki enpòtan pou Jézi Kwi. <sup>22</sup>Épi ou menm sav ki kalité moun Timòfi yé. Kon on papa èk ich li nou té ka twavay ansanm pou pli moun tann Bon Nouvèl-la konsèné Jézi Kwi.

<sup>23</sup>Menm kon mwen sav sa ki kay wivé mwen, mwen vlé voyé'y koté'w.

<sup>24</sup>Épi mwen ni konfyans-lan Senyè-a kay fè mwen vini koté'w touswit.

<sup>25</sup>Mwen katjilè i nésèsè pou mwen voyé fwè nou Ipafrodaytòs viwé koté'w. Mwen kontan ou té voyé'y kon an konmisyonnè pou té sa édé mwen. I ja twavay wèd pou simen Bon Nouvèl-la konsèné Jézi Kwi épi i ja doubout fò a koté mwen. <sup>26</sup>Sé pa ti anvi Ipafrodaytòs té anvi wè zòt tout, kon sa mwen ka voyé'y viwé koté'w. Sa fè'y lapenn an chay lè i sav zòt tann i té malad. <sup>27</sup>I té malad pou vwé épi i té mantjé mò. Mé Bondyé té ni pityé asou'y — sé pa asou'y tousèl, mé asou mwen menm tou, pou sa pa té ban mwen plis lapenn ankò. <sup>28</sup>Sé pou sa mwen pli anvi voyé'y viwé jwenn ou pou'w sa kontan ankò lè ou kay wè'y, épi pou mwen ni mwens lapenn. <sup>29</sup>Kon sa mwen ka mandé'w pou wisivwè fwè-a épi an pil tjè kontan, kon yon fwè an Senyè-a. Moutwé'y ki otan wèspé ou ni pou moun kon li, <sup>30</sup>paski i pwan wis èk lavi'y épi i té pwèskè mò pou lapéti twavay Jézi Kwi pou'y té sa édé mwen mannyè ou menm pa té sa édé mwen.

### Mannyè Moun Ka Vini Dwèt An Bondyé

**3** <sup>1</sup>Avan mwen fini lèt sala, fwè èk sè, mi sa mwen vlé di'w: Sé pou'w toujou ni tjè kontan paski ou ja manché épi Senyè-a. I pa ka fè mwen anyen pou mwen viwé di'w menm sé bagay-la mwen té ékwi'w avan-an. I kay bon pou ou si mwen fè sa.

<sup>2</sup>Sé pou'w véyé kò'w épi sé moun-an ki ka fè sé mové bagay-la. Yo menm kon chyen. Yo vlé sikonsayz zòt paski yo kwè lè yo fè sa, ou kay vini dwèt douvan Bondyé. <sup>3</sup>Mé sé nou menm ki ich Bondyé pou vwé. Sé nou ki ja wisivwè bon sikonsizyon-an an tjè nou. paski Lèspwi Bondyé ka édé nou adowé Bondyé èk nou ka ni tjè kontan an lavi-a nou ka viv kon yonn èvèk Jézi Kwi-a. Èk nou pa ka mété konfyans nou an sa nou yé ében an sa nou sa fè pou vini dwèt douvan Bondyé. <sup>4</sup>Mwen menm té sa mété konfyans mwen an sé bagay sala tou si mwen té vlé.

Si pyès moun kwè i sa mété konfyans li an sé bagay sala pou vini dwèt douvan Bondyé, mwen ni pli wézon pou mwen té sa fè sa. <sup>5</sup>Yo té sikonsayz mwen lè mwen té ni ywit jou, mwen fèt an nasyon Izwayèl-la, mwen sòti an lafanmi Bennjamin, mwen sé Jwif pi. Pa palé si ou ka gadé pou Jwif ki ka tjenbé lwa sé Jwif-la! Mwen sété on Fawizyen menm. <sup>6</sup>Mwen té cho tèlman pou lwa sé Jwif-la, mwen té ka jis pèsikité sé moun-an ki kwè an Jézi-a. Si on moun té sa vini dwèt lè yo obéyi sa lwa-a di, mwen pa té kay ni pyès fòt.

<sup>7</sup>Mé tout sé bagay sala mwen té kwè ki an pwofi mwen-an, mwen wè yo pa vo anyen pou mwen paski yo té ka anpéché mwen mété konfyans

mwen an Jézi Kwi. <sup>8</sup>Sé pa sé bagay sala tousèl, mé mwen kay simyé pèd tout bagay pou mwen sa ni an bagay ki pli enpòtan, pou mwen sa konnèt Jézi Kwi, Senyè mwen. Pou lapéti Jézi Kwi, mwen jété tout sé bagay-la mwen kwè ki té enpòtan-an èk mwen konsidiwé tout sé bagay sala kon zòdi. Mwen vlé dépan anlè Jézi Kwi tousèl pou mwen vini dwèt douvan Bondyé épi pou mwen sa viv kon yonn épi'y konplètman. <sup>9</sup>Kon sa mwen pa ni pyès lòt mannyè pou mwen sa vini dwèt douvan Bondyé pa kò mwen menm. Mwen té kwè sé lè mwen obéyi tout lwa-a mwen té kay vini dwèt douvan Bondyé, mé sa pa té fèt pyès. Mwen vini dwèt douvan Bondyé paski mwen mété lafwa mwen an Jézi Kwi. Bondyé ka fè moun vini dwèt douvan'y lè yo mété lafwa yo an Jézi Kwi. <sup>10</sup>Tout sa mwen vlé apwézan sé pou konnèt Jézi èk pou mwen sav pouvwa'y ka twaway an mwen, menm pouvwa-a ki té fè'y wésisité-a. Mwen vlé pou mwen sa soufè menm kon li, èk pou mò menm kon li tou. <sup>11</sup>Si mwen ni sé bagay sala, mwen ka èspéyé èk konfyans ki mwen kay wésisité lè mwen mò.

#### **Annou Kouwi Pou Nou Wivé An Bout-la**

<sup>12</sup>Sa pa vlé di mwen ja fini wivé an bout-la. Mwen pòkò wivé kalité moun-an Bondyé vlé mwen wivé-a. Mé mwen ka fè fòs kò mwen pou vini moun-an Jézi Kwi té vlé mwen vini-an lè i chwazi mwen. <sup>13</sup>Mwen asiwé, fwè èk sè, mwen pòkò vini moun-an Jézi Kwi té vlé mwen vini-an, mé on sèl bagay mwen ka fè, mwen ka kité zyé mwen asou sé bagay-la ki douvan mwen-an èk mwen pa ka chonjé sé bagay-la ki dèyè mwen.

<sup>14</sup>Kon sa mwen ka fè fòs kò mwen pou wivé an bout-la pou mwen sa genyen pwi-a. Pwi sala sé lavi étonnèl Bondyé ka kwiyé nou pou wisivwé paski nou kwè an Jézi Kwi.

<sup>15</sup>Nou tout ki konnèt mannyè pou obéyi Bondyé sipozé ni menm lidé-a mwen ni-an. Mé si adan zòt ni an lòt lidé, Bondyé kay fè yo konpwann sa pli aklè. <sup>16</sup>Mé annou kontiné maché menm mannyè-a nou té kouvansé maché-a.

<sup>17</sup>Fwè èk sè, fè menm sé bagay-la ou té wè mwen fè-a. Sé pou'w kouté sé moun-an ki ja swiv bon ègzanp-lan nou té ja mété ba ou-a. <sup>18</sup>La ni an pil moun, si ou gadé kalité lavi-a yo ka viv-la, ou kay wè sé lèlmi Jézi Kwi yo yé èk yo pa ka pwan lanmò'y asou kwa-a pou anyen. Mwen té toujou ka di'w sa avan épi apwézan mwen ka di'w ankò èk dlo an zyé mwen. <sup>19</sup>Sé moun sala, bout yo sé lanfè paski yo ka viv pou plè kò yo tousèl. Yo ka kontan pou di sé mové bagay-la yo ka fè-a épi yo pa ka menm hont. Sèl sa yo ka katjilé sé bagay ki an latè-a tousèl. <sup>20</sup>Mé syèl sé péyi nou épi nou ka èspéyé èvèk kontantman pou sovè nou, Senyè Jézi Kwi, ki ni pou sòti an syèl. <sup>21</sup>I kay sèvi pouvwa'y pou mennen tout bagay anba kondwit li. I kay chanjé vyé kò fèb nou-an pou fè'y vini menm kon sa li-a ki ni pouvwa-a.

**4** <sup>1</sup>Kon sa fwè èk sè mwen, mwen enmen zòt an pil èvèk mwen anvi wè zòt toubonnman. Pa dé kontan ou fè tjè mwen kontan èk sé ou ki ka ban mwen wézon-an pou mwen sa lèvé tèt mwen ho. Kon sa fwè mwen, kontiné doubout fò an lavi-a ou ka viv kon yonn èk Senyè-a, kon mwen té ja di'w.

### **Pòl Di Sé Fwè Filipay-la Ki Sa Pou Yo Fè**

<sup>2</sup>Youdiya épi Sintiki, mwen ka mandé'w souplé, dakò èk yonn a lòt paski zòt sé sésé an Senyè-a. <sup>3</sup>Épi ou menm, kanmawad mwen ki té ka toujou twavay byen épi mwen, mwen vlé'w édé sé madanm sala wanjé zafè yo, paski yo ja twavay wèd pou té sa simen Bon Nouvèl-la konsèné Jézi Kwi, ansanm épi Klément épi sé lèzòt fwè-a ki té ka twavay épi mwen-an. Non yo ékwi an liv-la ki ni non sé moun-an ki ni lavi étonnèl-la.

<sup>4</sup>Sé pou'w toujou ni tjè kontan an Senyè-a. Mwen ka di'y ankò: Ni tjè kontan! <sup>5</sup>Kité tout moun wè ou ni bon mannyè. Senyè-a ka vini touswit. <sup>6</sup>Pa bay kò'w twaka pou anyen, mé an tout lapwiyé'w, mandé Bondyé sa ou bizwen-an épi toujou wimèsyè'y lè ou ka pwédyé. <sup>7</sup>Épi si ou fè sé bagay sala, Bondyé kay ba'w lapé an tjè'w épi an lidé'w, paski ou ja manché èk Jézi Kwi. Lapé sala tèlman bon pyèsonn pa sa fini konpwann li.

<sup>8</sup>Pou mwen fini, fwè èk sè, sé pou'w plen lidé'w èk sé bagay-la ki bon-an épi bagay ki ka plè Bondyé, bagay ki vwé, bagay ki wèspèktab, bagay ki dwèt, bagay ki nèt, bagay ki bèl, épi bagay ki pa ka fè moun hont. <sup>9</sup>Sé pou'w toujou fè sé bagay-la mwen té moutwé'w-la lè mwen té ka palé ba'w épi sé bagay-la ou té wè mwen ka fè-a. Ou té aksèpté'y kon an bon mannyè pou viv. Épi Bondyé ki ka ban nou lapé an tjè nou kay toujou la épi'w.

### **Pòl Wimèsyè Sé Fwè Filipay-la Pou Kado-a**

<sup>10</sup>Tjè mwen kontan an pil an lavi-a mwen ka viv kon yonn èk Senyè-a pou wè apwé tèlman lontan ou ka édé mwen ankò. Mwen sav ou té vlé voyé sa ou ni ban mwen, mé ou pòkò té jwenn lokazyon-an. <sup>11</sup>Mwen pa ka di sa paski mwen bizwen. Mwen ja apwann pou mwen satisfè èk sa mwen ni. <sup>12</sup>Mwen sav ki sa i yé lè mwen bizwen épi ki sa i yé lè mwen ni plis pasé sa mwen bizwen. Mwen ja apwann sigwé-a ki népòt koté mwen yé, népòt lè, mwen ka satisfè, menm si bouden mwen wèd, ében menm si mwen fen, menm si mwen ni ti tak, ében menm si mwen ni an pil. <sup>13</sup>Mwen sa fè tout bagay paski Jézi Kwi ka ban mwen kouway-la.

<sup>14</sup>Mé i té bon an pil pou'w té sa édé mwen lè mwen té an twaka. <sup>15</sup>Ou jan Filipay konnèt byen lè mwen té kité Masédonnya, apwé mwen té koumansé pwéché Bon Nouvèl-la an péyi zòt-la, ou sété sèl légliz ki té

twavay ansanm épi mwen. Sé ou tousèl ki té sépawé sa zòt ni épi mwen. <sup>16</sup>Lè mwen té an vil Tèsalonnika, plis pasé yon kou ou voyé sa mwen té bizwen-an. <sup>17</sup>Sé pa dèyè kado zòt mwen yé, mé mwen kontan pou mwen sav Bondyé kay ba'w plis pasé sa ou ja ni-an. <sup>18</sup>Apwézan mwen vlé fè'w sav mwen ja wisivwè tout sé bagay-la zòt voyé-a. I plis pasé sa mwen té bizwen. Mwen ni plis pasé sa mwen bizwen paski Ipafrodaytòs mennen kado'w-la ban mwen. Kado'w-la sé menm kon yon sakwifis ki ka santi bon, an sakwifis Bondyé ka aksèpté épi an sakwifis ki ka plè'y. <sup>19</sup>Bondyé-a mwen ka sèvi-a ni an chay wichès épi i kay ba'w tout sa ou bizwen adan an bèl mannyè paski ou ja manché èk Jézi Kwi.

<sup>20</sup>Annou lévé non Bondyé, Papa nou, pou tout tan épi pou tout tan. Amèn.

### **Pòl Voyé On Dènyé Bonjou**

<sup>21</sup>Mwen ka voyé bonjou bay tout ich Bondyé ki ja manché èk Jézi Kwi, épi sé fwè-a ki ka édé mwen-an ka voyé bonjou tou. <sup>22</sup>Tout sé ich Bondyé-a ki isi-a an vil Ronm ka voyé bonjou, èspwèsman sé moun-an ki an gwan kay wa-a.

<sup>23</sup>Mwen ka pwédyé pou Bondyé sa voyé lagwas Senyè Jézi Kwi anlè zòt tout.